

(國學文庫第十八編)

粵

海

關

志

第一册

皇朝訓典

前代事實

中華民國二十四年四月重印

(國學文庫第十八編)

粵

海

關

志

第一冊

皇朝訓典

前代事實

中華民國二十四年四月重印

據道光年刊本

(行每
半葉九
字)

重印

(定價國幣六角五分)

粵海關志凡例

一周官太宰言九賦合關市爲一司關亦云掌國貨之節以聯門市蓋司
市之商賈與司關之賓客事例相通卽後世職貢互市之始而今關榷
所由昉也聖朝版輿之廣度越千載東南番舶實有從古未通中國者
辨其種族攷其程途則又兼周官懷方訓方匡人撣人象胥各官所掌
職司綦重故今恭纂志書以昭法守

一宋潛說友撰咸淳臨安志首載詔令然冠以前朝非尊王之義惟鄭居
中等政和五體新儀首列御筆指揮最爲足法今用其例恭載聖訓上
諭之爲便民除弊發者尊爲訓典貽範萬世

一荀子曰欲觀聖王之蹟則於其粲然者矣後王是也蓋閱世雖有古今

資攷鏡之益

一各關徵稅及巡查之地必須題報有案者方准責成員役粵海關所轄海口尤多今遵會典所載粵海關口岸名目就其地勢爲圖庶便查覈一漢書百官公卿表先載各官廢置而後爲表以紀在官之年月今志監督委員及縣丞司庫之有關權務者吏書丁役亦以額書之至表之系年以監督爲主餘官附焉

一關務以稅爲重故立稅則以志抽收分數溯自乾隆五十一年清理關務以後邇年仍遞有改易今以現奉戶部則例及關冊所載著於篇一既設稅額則有課額課額有正有羨道光十四年前任督臣盧坤奏比

較近年粵海關徵銀歲多至一百六十餘萬兩有奇而商民宴如外夷歡悅故錄攷核報解之條以紀財貨阜通之本

一理財之官惟謹出入稅則課額皆所以經其入也若夫廉俸工食存畱支給之數則以經其出也故以經費繼之其澳門同知香山縣丞及武職營弁之俸餉應歸布政使奏銷者不在此數

一會典及部頒則例各關皆有禁令誠以利之所在弊即生焉今於禁令分官吏商販二目其商販中闢出闢入之物各以類書而鴉片煙查禁最嚴故備載新定章程以肅功令

一廣東營汛之設固非專爲榷務而海口及夷商往來之路向建礮臺又稽查番舶必資水師之力故關政轄於督臣而水師亦歸其節制實有

相須爲用之勢也謹輯近口之營弁礮臺船額兵數編爲兵衛一門其餘與關無涉者則概從略

一明王圻論互市之法以貢舶商舶當分爲二事言貢舶爲王法所許司於市舶貿易之公也商舶爲王法所不許不司於市舶貿易之私也蓋明制市因於貢非入貢者不得互市故有區別之法我朝廓然大公因貢而來者稅應免則免之專以市而來者貨應徵則徵之此海外諸番所以畏懷也今入貢各國入貢舶門來市各國入市舶門

一元典章有舶商舶牙今之夷商卽古之舶商也今之行商卽古之舶牙也二者相須以成互市故立行商夷商分紀其事

一瀛海之大莫測涯涘且氣候以陰晴而異徑路以沙線而分必在精譜

乃占利涉今輯海中雜占及潮信洋面之異同爲雜識一門以資攷覈
一馬端臨作文獻通攷每門之首繫以序文茲編十四門謹於各門述其
意於序用誌緣起

粵海關志總目錄

- | | | |
|-----|------|----|
| 卷一 | 皇朝訓典 | 一 |
| 卷二 | 前代事實 | 一 |
| 卷三 | 前代事實 | 二 |
| 卷四 | 前代事實 | 三 |
| 卷五 | 口岸 | 一 |
| 卷六 | 口岸 | 二 |
| 卷七 | 設官 | 附表 |
| 卷八 | 稅則 | 一 |
| 卷九 | 稅則 | 二 |
| 卷十 | 稅則 | 三 |
| 卷十一 | 稅則 | 四 |

-
- | | | |
|------|----|---|
| 卷十二 | 稅則 | 五 |
| 卷十三 | 稅則 | 六 |
| 卷十四 | 奏課 | 一 |
| 卷十五 | 奏課 | 二 |
| 卷十六 | 經費 | |
| 卷十七 | 禁令 | 一 |
| 卷十八 | 禁令 | 二 |
| 卷十九 | 禁令 | 三 |
| 卷二十 | 兵衛 | |
| 卷二十一 | 貢舶 | 一 |
| 卷二十二 | 貢舶 | 二 |

卷二十三 貢舶 三

卷二十四 市舶

卷二十五 行商

卷二十六 夷商 一

卷二十七 夷商 二

卷二十八 夷商 三

卷二十九 夷商 四

卷三十 雜識

粵海關志第一冊目錄

卷一 皇朝訓典

順治六年	二	乾隆六年	一七
同 八年	二	同 七年	二二
康熙四年	三	同 三十七年	二三
同二十五年	四	嘉慶十七年	二十五
雍正元年	五	同十九年	二六
同二年	六	道光三年	二七
同七年	八		
同八年	一一		
同十三年	一二		
乾隆二年	一三		

卷二 前代事實

漢	三〇
後漢	三二
六朝	三四
唐	三五

宋.....四一

卷三 前代事實二

宋續.....五七

卷四 前代事實三

元.....八五

明.....一〇五

粵海關志卷一

皇朝訓典

臣謹案自周易有重門擊柝之文周禮有司關舉貨之法經制所定在昔爲然秦漢以來征榷愈密降及明季以軍興餉絀稅額屢增我朝肇造區夏蕩滌繁苛順治元年革明末加增稅額四年禁勢官土豪津頭牙店擅科私稅六年禁例外多征迨海禁既開悉停口內橋津地方貿易車船貨物抽分又酌減洋船丈抽之例康熙三十七年減廣東海關稅額至乾隆年間外洋夷船有舍粵海而趨浙海者疆吏欲據浙關科則更定粵海課額高宗純皇帝諭以示在限制不在增稅列聖相承如天覆冒溫綸誥誠至再至三惟恐司榷之人因利乘便我皇上又整飭

關務諭以實力整頓包攬等弊嚴行約束家人書吏蓋必清權務之源而後可以裕課可以通商可以便民可以柔遠所謂一得而無不得者道在此也書曰是彝是訓于帝其訓又曰聖有謨訓明徵定保凡在司事臣工所當恭闡德意而遵行勿替焉爾

順治六年

聖諭設關徵稅原寓稽察奸宄之意非專與商賈較鐸銖也爾部行文各關滿漢官員以後俱照原定則例起稅如有徇情權貴放免船隻乃於商船增收或希充私橐例外多征以病商民者一經查出定行重處

順治八年

聖諭權關之設原有定額差一司官已足何故濫差多人忽而三員忽而

二員每官一出必市馬數十匹招募書吏數十人未出都門先行納賄戶部填給糧單沿途騷擾鞭打驛官奴使村民包攬經紀任意需索量船盤貨假公行私商賈恐懼不前百物騰貴天下通行河道何以至此朕灼知今日商民之苦著仍舊每關設官一員其添設者悉行裁去以後不得濫差其裁缺撤回之員既不利於商賈又何利於州縣之民戶部不得妄咨勤勞吏部不得更與銓補國家愛惜牧民之官豈仍前朦混爾部謹識朕諭實心遵守毋負朕通商愛民之意

康熙四年

聖諭各省關鈔之設原期通商利民以資國用近聞各處收稅官員巧立名色另設戥秤於定額之外恣意多索或指稱漏稅挾詐過往商民或將

民間日用瑣細之物及衣服等類原不抽稅者亦違例收稅或商賈已經報稅不令過關故意遲延揩勒遂其貪心弊端甚多難以枚舉嗣後凡地方收稅官員俱著洗心滌慮恪遵法紀如有前項情弊在內科道官在外督撫嚴密參奏從重治罪如督撫不行參奏別經首發卽治該督撫以徇縱之罪

康熙二十五年

聖諭國家設關榷稅必征輸無弊出入有經庶百物流通民生饒裕近來各關差官不恪遵守定例任意征收託言辦銅價值浮多四季解冊需費將商人親填部冊改換塗飾既已充肥私橐更圖溢額議敍重困商民無裨國計朕思商民皆我赤子何忍使之苦累今欲除害去弊必須易轍改弦

所有見行例收稅溢額卽陞加級紀錄應行停止其採辦銅斤定價既已
不敷作何酌議增加其四季達部冊籍應俟差滿一次彙報嗣後務令各
差潔己奉公實心釐剔以副朕體下恤商至意如或仍前濫征侵隱藐玩
不悛作何加等治罪至銅價旣議加給額稅應否量征俱著九卿詹事科
道詳議具奏

聖諭凡收海稅官員因係創行設課希圖盈溢將出入商民船隻任意加
征以致病商累民亦未可定著嚴加申飭務令恪遵定例從公征收無溢
無苛以副朕軫恤商民至意

雍正元年

聖諭國家之設關稅所以通商而非累商所以便民而非病民也朕撫御

寰區加惠黎庶惟恐民隱不能上達近聞榷關者往往寄耳目於胥役不實驗客貨之多寡而止憑胥役之報單胥役於中未免高下其手任意勒索飽其欲者雖貨多稅重而矇蔽不報者有之或從輕報者有之不遂其欲雖貨少稅輕而停滯關口至數日不得過是以國家之額稅聽猾吏之侵漁以小民之脂膏飽姦胥之谿壑司其事者竟若罔聞又聞放關或有一日止一次者江濤險急河路窄隘停舟候關於商民亦甚不便嗣後榷關者務須秉公除弊過關之船隨到隨驗應收稅者納稅卽放不得任胥役作姦勒索阻滯以副朕通商便民之意

雍正二年

聖諭從來關榷之設或用欽差專轄或令督撫兼理無非因地制宜利商

便民之至意也大抵關差之弊皆惟知目前小利恣意侵漁聽信家丁縱容胥吏開關分別遲早肆無厭之誅求報單任意重輕爲納課之多寡飽谿壑者則任其漏稅代爲朦朧不遂欲者則倒篋傾箱不遺纖細致商賈畏懼裹足不前行旅彷徨越關迂道則因商實所以自困也故關差惟在嚴禁苛求使舟車絡繹貨物流通則稅自足額至於督撫皆封疆大吏當仰體朝廷歸併之心不得視爲帶理漫不經心誤任屬員聽其剝削況欽差猶每年更換而督撫兼理則無限期若不實心奉法遴委得人責有攸歸其恪遵朕旨

聖諭朕念商賈貿易之人往來關津宜加恩恤故將關差歸併巡撫兼理以巡撫爲封疆大吏必能仰承德意加惠商旅也但各關俱有遠處口岸

所委看管之家人賢愚不一難免額外苛求及勒取飯錢之弊稍不如意則執送有司有司礙巡撫之面徇情枉法則商民無所控訴矣嗣後將上稅課之貨物遵照則例逐項開明刊刷詳單分發各貨店徧行曉示使眾皆知悉其關前所有刊刻則例之木榜務令豎立街市人人共見不得藏匿屋內或用油紙掩蓋以便高下其手任意苛索立法如此自能剔除弊端但爾等受朕委任之重尤當仰體朕心遴選誠實可信之人以任稽查之責必期商民有益方爲稱職

雍正七年

聖諭各關開放船隻之處向例部頒號簿以便稽查近聞各關別設私簿征收惟於報部之時始將號簿挨日填造其意以水路商船往來多寡不

齊若據實填簿則不能逐日有征收數目恐干部駁是以設法勻派填造如此則簿內全非實在數目與商船過稅串票毫不相符殊非政體凡事據實則可以無弊作僞則弊竝叢生今既任意勻派填造則號簿亦爲虛設矣嗣後各關於部頒號簿務須據實填寫如無船隻過稅之日亦卽註明不得仍蹈前轍致滋弊端

聖諭朕卽位以來屢有臣工條奏各處地方官征收落地稅銀交公者甚少所有盈餘皆入私橐雍正三年又有人條奏廣西梧州一年收稅銀四五萬兩不等止解正項銀一萬一千八百兩潯州一年收稅銀二萬兩止解正項銀二千六百兩應令該撫查覈據實奏聞并令各省抽收稅銀之處俱據實奏報等語隨經九卿議令各省督撫遴選幹員監收一年之後

視其盈餘若干奏聞候旨朕思孟子言治國之道首稱取於民有制所謂有制者卽一定額征之數也若課稅之屬無顯然額征之數則官吏得以高下其手而閭閻無所遵循卽如從前各處稅課經地方官征收有於解額之外多數倍者且多至數十倍者旣無一定程則多寡可以任意其弊不可勝言屬員旣已貪取上司必至苛求官員旣已營私胥吏必至橫索日積月累漸有增加之勢豈非生民之隱患乎朕是以允從條奏所請及九卿所議令各省督撫委員監收以定科則其征收不及舊額者亦令奏聞降旨裁減年來報出盈餘之處朕皆令畱於本地或作各官養廉之需或爲百姓公事之用使官員用度有賴自不妄取民財使地方公用有資卽可寬恤民力無非以小民財物仍用之於民間不令飽貪官汙吏之慾

壑而已乃聞外省中多有奉行不善者以朕愛民除弊之善政而庸劣有司借歸公之名或肥身養家或爭多翻勝以致肩挑背負之微物皆征收稅課而該督撫等又不悉心稽查民間苦於擾累自諭到通行之後倘仍有如此者必從重治罪決不寬貸

雍正八年

聖諭向來各處落地稅銀大半爲地方官吏侵漁入己是以定例報出稅銀四百兩者准其加一級後因查報漸多吏部定議報出稅銀八百兩者准其加一級多者以此計算年來地方官員皆知守法奉公凡有稅課隨收隨報不敢侵隱其報出之數每倍於舊額祇恐將來不無冀倖功名之人希圖優敍以致恣意苛索擾累小民且落地稅銀非正項錢糧有一定

之數者可比侵蝕隱匿者固當加以處分而爭多鬪勝者不但不當議敍亦當與以處分其如何定議並如何議敍加級處分之處著吏部戶部悉心妥議具奏

雍正十三年

高宗純高帝聖諭朕聞各省地方於關稅雜稅外更有落地稅之名凡耰鋤箕帚薪炭魚蝦蔬菜之屬其值無幾必查明上稅方許交易且販於東市既已納課貨於西市又復重征至於鄉村僻遠之地有司耳目所不及或差胥役征收或令牙行總繳其交官者甚微不過飽姦胥猾吏之私橐而細民已重受其擾矣著通行內外各省凡市集落地稅其在府州縣城內人煙湊集貿易眾多且官員易於稽查者照舊征收不許額外苛索亦

不許重複征收若在鄉鎮村落則全行禁革不許貪官汙吏假借名色巧取一文著該督撫將如何裁革禁約之處詳造細冊報部查覈倘奉旨之後仍有不實心奉行暗藏弊竇者朕必將有司從重治罪該督撫並加嚴譴此旨可令各省刊刻頒布務令遠鄉僻壤之民共知之

乾隆二年

聖諭據原任江西巡撫俞兆岳奏乾隆元年九江贛州兩關稅課盈餘銀兩較前任共減收九萬有餘此事交與該部及新任巡撫岳濬查覈奏聞朕前因各省關稅於正額之外每多無名之費恣意科索苦累商民是以降旨釐剔弊端將應行減除者概令禁止全在督撫大臣等督率司榷之員潔己奉公實力遵行以副朕輕徭薄賦加惠商民之至意今就江西一

省言已少收銀十萬兩推之各省則約計百有餘萬矣如果商民得沾實惠卽更逾此數亦朕所樂聞有何吝惜但從來關榷稅務與百物價值原係相爲表裏如果關稅減輕則物價亦必平賤若稅輕而價仍不減是各關所減課銀商民並未沾被恩澤徒飽吏胥之囊橐耳我皇考臨御以來澄清吏治凡此等官侵吏蝕之習久已弊絕風清今督撫諸臣如不能稽察屬員被其蒙混則庸懦無能有忝封疆若或已身稍有染指則名節有虧朕一經擯斥之後斷不復加錄用也可將此旨傳諭各省督撫令其各行稽察深自警省若錯會朕釐剔弊端藏富於民之意又欲多報贏餘以致商民受困識見卑鄙其罪更不可逭矣

聖諭御史舒赫德條奏請將各省稅務歸併旗員管理此奏甚無識見彼

意以爲旗人生計艱難若管理稅務則可沾餘潤以資養贍不知國家設立關隘原以查察奸宄利益商民並非爲收稅之員身家之計也若以旗員貧乏而差遣之是導之使貪矣朕日以砥勵廉隅訓勉臣工尙恐其不能遵奉而可以謀利之見爲之導乎況當日旗員管理關務者亦指不勝屈惟視此以爲利藪故貪黷之風侵蝕之弊不一而足因而身罹罪譴籍其家產累及子孫是今日旗員之貧乏未必不由於當年收稅之所致也豈可使之復蹈前轍且各省委辦稅務率多道府等官並無滿漢之別如滿洲有任道府而廉潔自愛者何嘗不可派委而必定其爲例乎總之爲上者施逮下之仁惟有勵以忠勤示以節儉固其根本之圖而爲下者則當早作夜思宣力供職以永受國家惠養之恩方可謂之計長久蓋厚其

生計之道不可不思而長貪風以爲下則利未見其爲利且貽害於後日此理甚非所以教旗員之道並非所以受旗員之心也朕御極之初圖理琛卽爲此奏總理王大臣亦以爲可行朕並未俞允後此陳奏者紛紛朕概不准行亦未交議今舒赫德又條奏及此可將朕旨宣示於外使咸知朕意毋得以竟不可行之事再行妄奏

聖諭朕思商民皆爲赤子輕徭薄賦俾人人實沾惠澤乃朕愛養黎庶之本懷但恐官吏不能實力奉行仍多取巧以飽私橐則徒於國課有虧而於商民無益卽如年來各省關稅較前額數大減矣其取之商民者仍似未減若關稅減輕則商貨價值亦應平減今京師貨物騰貴仍復如前可知商民未得實沾減賦之益

乾隆六年

聖諭各省關稅定有正額而儘收儘解自有贏餘此不過杜司榷者侵蝕之弊並無有累於商民也但各省年歲之豐歉不同貨物之多寡亦異其贏餘原不能每年畫一近見各關報滿之時如贏餘浮於上年則部中不復置議如減於上年之數卽行駁覈司榷者惟恐部駁必致逐歲加增年復一年將何所底止苦累商民事有必然之勢朕思關稅贏縮相去本不致懸殊若乙年所報贏餘之數稍不及甲年原可不必駁覈若過於短少亦必有情由惟應令督撫稽查則地方實在情形自難逃於公論總之查覈過嚴則額數日增其害在於眾庶查覈稍寬則司榷侵蝕其損在於國帑此中輕重固有權衡況清廉之吏斷不肯侵帑肥家而不顧行止者終

敗露亦斷無安享無事之理其如何定例之處著大學士會同該部詳議具奏

聖諭近見居官者家計多覺艱難而旗員爲甚朕思百姓尙欲其盈寧而況居官者乎因欲措久遠利益之道而先思其所以致此之由細推其故蓋由於查辦虧空其囊橐不足抵補則將房屋入官以致資生無策棲身無所且不獨本身爲然旁及弟兄親戚平日沾其餘潤者亦皆牽帶於中以補公項而仕宦之家遂多致貧乏矣又思當日所以如此辦理者蓋以其先各省火耗聽其自取漫無稽查而關稅正額之外盈餘盡皆入己以致官員縱欲敗度恣意奢靡親族分肥於一時而不計後日之波累若不加意整飭則官箴不恤國法漸弛大爲人心風俗之害是以我皇考旋乾

轉坤密籌默運然後定有章程世風不變雖滿漢官員等用度不能充餘然無甚貧甚富之別且不貽後日身家之患此我皇考仁至義盡之舉非言利也若云言利則未解火耗之前地方一切公務皆係官民承辦今則動用公項公項猶前之火耗也然以公項不足而請動正帑者不知其凡幾矣眾所共知國家亦豈利此而爲之乎又如關差一項從前司稅之人歸之私囊者後令報出卽爲盈餘耳並非現征之外有所加增也雖管關之人賢愚不一或有奉行不善欲增課以見長因而需索累民者然此十之三三耳較之未經澄清以前已覺減少者蓋多矣朕臨御以來又復覈減稅課不下數十萬且不時嚴飭該管諸臣剔除諸弊至再至三今條奏關稅者尙屬紛紛如海望係皇考及朕簡用之大臣豈不知國體而但知

言利者比其管理崇文門稅務不過儘收儘解盡行報官不似先前之入私橐因而見其獨多耳朕卽另派大臣管理理想亦如其數也若如御史胡定所奏苛索種種朕可以信其必無何爲加此過甚之詞耶崇文門稅務不必另議至外省關課皆久經該督撫就近稽查除現設口岸報部有案者照舊設立外其有私行增添之口岸逐一詳查題報應畱者畱應革者革此番查辦之後司榷之員若再有違例苛索者胥役嚴處官吏嚴參該督撫不行查察經朕訪聞必於該督撫是間至滸墅北新二處係江浙大關尤爲緊要交與楊超曾德沛照此稽查辦理楊超曾德沛皆係國家公忠大臣必不肯徇庇管關之員而貽累小民亦斷不肯似腐儒妄生議論違道以干譽也此番定議之後嗣後各官風聞不實之言不得再行瀆陳

總之天下之事盈虛消長相爲倚伏從前官員取盈以圖快意未幾而有
缺正帑國法具在清查著追而家計蕩然不但取盈者不爲已有且並失
其祖父所畱之業子孫並受其困比比皆然莫之或爽近觀臣工之意頗
有以現在所行之例爲不便者意欲將耗羨盡與本官司權悉從內遺謂
可多得養廉食用豐裕不知豪奢之習起於有餘日下多獲資財不過三
數年閒俯仰從容欣欣得意未幾而匱乏隨之且必致仍前之虧缺公帑
而清查著追之事隨之朕縱不能措置得當使受目前之惠又何忍縱之
敗度以隱貽日後之憂乎況古云王者之國富民霸者之國富士僅存之
國富大夫如果百姓家給人足卽居官者不甚豐饒猶不失輕重之權衡
也且言居官貧乏仍出於居官者之口而入於朕耳朕亦不過疑信各半

究之思所以富之之心未如思所以富萬民之心之切也朕仰皇考貽謀遠略一切章程惟有守而不失閒或法久弊生隨時酌量調劑則可若欲輕議更張不獨勢有不可亦且朕之薄德力有所不能可將此曉諭內外大小臣工並八旗知之

乾隆七年

聖諭朕惟惠養萬民之道以輕徭薄歛爲先自御極以來於蠲租減賦外割除各省關稅不下百萬又令將稅課規條刊刻木版遍行曉諭不許額外征收宜其商民均沾惠澤行旅各安牧圉乃近聞各關過往商旅尙不能普被恩惠怨聲嘖嘖究其由來皆因司榷之家人胥役巧立名色重戥征收勒捐需索弊端百出不飽其欲則逗遛不肯放行大爲行旅之害是

國家徒有減稅損上之德而商民未受減稅益下之恩無知者尙曉曉於
稅課之重所謂不揣其本而齊其末即使再減數百萬額稅用是以往朕
知其於商民仍屬無益也夫司榷官員一任家人胥役肆橫無忌漫無覺
察商旅其何以堪朕思督撫有稽查通省之責凡屬地方利弊何一不當
畱心釐剔而關稅弊竇若此朕在京尙有所聞督撫身在本省豈竟一無
聞見乎總因視非已事故爾漠不關心耳嗣後著該督撫嚴行訪察遇有
此等弊端立卽嚴拏重究如司榷官員瞻徇袒護亦卽據實奏聞不得視
爲具文以奉旨之後一查即可了事務期實力稽查俾商民永無苦累倘
朕再有所聞或被科道指實參奏朕惟該督撫是問

乾隆三十七年

聖諭據弘晌奏閩海關各口岸委員征收稅課請咨部分記功過一摺所辦非是各關口分派委員稽查就其勤惰分記功過以示勸懲乃該管關衙門自應酌辦之事本非可由部議敍議處是以前歲弘晌條奏時卽批示交部令與鐘音詳酌辦理嗣據鐘音議覈此款應聽該衙門自行辦理而文員考覈功過毋庸另辦因爲允行今弘晌奏到竟按分數盈絀開列清單請咨部稽覈殊屬瑣屑不成事體國家設立榷關原以稽查奸宄巡緝地方卽定額抽征亦恐逐末過多藉以遏禁限制至各口岸商船出入每月多寡不同稅額卽因之贏縮豈能預爲定數且委員等如果有多少報及勒索賄放等情弊查出卽應治罪若因此繁設科條按月額爲殿最非惟事涉紛繁不成政體並恐委員等畏過貪功違例浮征苛刻商

賈其流弊將無底止卽如昨歲淮關監督方體浴上年過關船少額數不足遂爾多方繁擾致商販裹足不前經朕察其辦理不善將伊交部嚴加議處卽寓防微杜漸之意朕辦理庶政務崇大體從不肯爲繁碎難行之事至征榷一事惟嚴稽官吏之侵剝不使絲毫累及商民弘喻所奏不可行並著傳旨申飭仍通諭中外知之

嘉慶十七年

聖諭御史陳超曾奏請飭各關監督及總理兼理關務各員慎選家丁書吏並隨時嚴行約束一摺各省關口征收稅課勢不能不派家丁書吏代爲經管該丁役等有誠實謹守者或不敢作姦犯科若貪詐之徒用度侈靡則虧缺侵隱之弊相因而起近年各省關稅每多絀短未必不由於此

嗣後各直省有經征關稅之責者務宜選誠實家丁書吏分派經管並隨時查察嚴行約束其狡僞侵欺者卽隨案懲辦庶權務肅清自於公帑有裨將此通諭知之

嘉慶十九年

聖諭關市之設所以通商便民成法極爲詳備近日該管官奉行不實日漸廢弛各關口應立之課稅木榜並詳單小本均不豎立刊刻商賈不知稅例多寡任聽家人更役額外抑派多收少報虧課病商叢滋弊竇至各省牙行亦不按年清查率多頂冒朋充甚或假託官差多方苛索俱應隨時查禁著通飭管理稅務衙門及直省地方官申明例禁實力奉行勿任姦胥市儉勾串欺朦以除積蠹

道光三年

上諭給事中清安等奏整飭關務以澄弊源一摺各關正額盈餘例有常數近年征收虧短緣積弊未能悉除凡關津市鎮地方往往有惡棍把持蠹役盤踞及牙行鋪戶人等相緣爲姦包攬商賈串囑在關家人書吏以重報輕以多報少通同掩飾漁利分肥甚至納賄私放偷漏隱匿皆所不免嗣後各關務須實力整頓包攬等弊嚴行約束家人書吏毋得稍有徇縱俾關務胥歸覈實以裕課項

粵海關志卷一終

粵海關志卷二

前代事實一

臣謹按馬端臨作文獻通考立市糴門以市易與互市並列竊以爲二者名同而實異也市易之法原於均輸和買曰貸息曰抵當曰貿遷以縣官而行黠商豪賈之所爲究之物價騰踴商民怨讟此新法所以亂天下也若互市則誠所謂以其所有易其所無矣無抑配之弊無科率之煩收征稅之入省戍守之費華夷交資其用公私均享其利故自漢至今行之不改在陸路者曰互市在海道者卽曰市舶其設官也肇於唐其立制也備於宋然有明中葉又時通時罷者何哉蓋宋之市舶主於助國用明之市舶主於總貨寶有所利而爲之勢必有委曲以事彌

縫侵漁以快壘斷者求其萬全豈可得乎我國家經費有常不資商權
不貪爲寶無取珍奇惟推柔遠之懷爲便民之舉衡之前代原不可同
年而語顧不知前代之所以失無由知我朝之所以得法積久而大備
則前事之師固鑒古者所不廢也謹敍兩漢六朝通商之事而唐宋以
來市舶按時代編焉

漢

漢高帝十一年遣陸賈立趙佗爲南越王與剖符通使和集百越母爲南
邊受害與長沙接境高后時有司請禁南越關市鐵器佗曰高帝立我通
使物今高后聽讒臣別異蠻夷隔絕器物此必長沙王計也

史記南越
尉佗傳

謹案宋趙汝适作諸番志序以爲禹貢載島夷卉服厥篚織貝爲蠻夷

通貨中國之始不知夏書所言專謂職貢非通市也惟趙佗傳言南越
關市鐵器當爲通市之始宋史食貨志言互市舶法始於漢初與南粵
通關市是也故首載之

粵地處近海多犀象璫瑁珠璣銀銅果布之湊中國往商賈者多取富焉
番禺其一都會也自合浦徐聞南入海得大州東南西北方千里武帝元
封元年略以爲儋耳珠崖郡元帝時罷棄之自日南障塞徐聞合浦船行
可五月有都元國又船行可四月有邑盧沒國又船行可二十餘日有譙
離國步行可十餘日有夫甘都盧國自夫甘都盧國船行可二月餘有黃
支國民俗略與珠崖相類其州廣大戶口多多異物自武帝以來皆獻見
有譯長屬黃門與應募者俱入海市明珠璧流離奇石異物齎黃金雜繪

而往所至國皆稟食爲耦蠻夷賈船轉送致之亦利交易剽殺人又苦逢
風波溺死不者數年來還大珠至圍二寸以下平帝元始中王莽輔政欲
耀威德厚遺黃支王令遣使獻生犀牛自黃支船行可八月致皮宗船行
可二月到日南象林界云黃支之南有已程不國漢之譯使自此還矣

漢書

地理

後漢

交趾之南有越裳國周公居攝六年越掌以三象重譯而獻白雉周德既
衰於是稍絕及楚子稱霸朝貢百粵秦并天下威服蠻夷始開嶺外置南
海桂林象郡漢興尉佗自立爲南越王傳國五世至武帝元鼎五年遂滅
之分置九郡元帝初元三年罷珠厔逮王莽輔政元始二年日南之南黃

支國來獻犀牛世祖建武十二年九真徼外蠻里張游率種人慕化內屬
明年南越徼外蠻夷獻白雉白兔肅宗元和元年日南徼外蠻夷究不事
人邑豪獻生犀白雉安帝永初元年九真徼外蠻夷舉土內屬延光元年
九真徼外蠻貢獻內屬三年日南徼外蠻復來內屬順帝永建六年日南
徼外葉調王便遣使貢獻永和二年日南象郡徼外蠻夷亂交趾刺史樊
演發兵救之反爲所攻公卿百官皆議遣將發兵大將軍從事中郎李固
駁之四府悉從固議拜祝良爲九真太守張喬爲交趾刺史由是嶺外復
平靈帝建寧三年烏滸人內屬皆受冠帶熹平二年日南徼外國重譯貢
獻六年復來貢獻後漢南蠻西傳

孟嘗遷合浦太守郡不產穀實而海出珠寶與交趾比境常通商販賈羅

糧食

後漢書
本傳

六朝

西南夷訶羅陁國宋元嘉七年遣使奉表願勅廣州時遣船還不令所在

有所陵奪

宋書夷
蠻傳

扶南國在日南郡之南海西大灣中去日南可七千里在林邑西南三千餘里城去海五百里其南界三千餘里有頓遜國在海崎上地方千里城去海十里頓遜之東界通交州其西界接天竺安息徼外諸國往還交市所以然者頓遜入海中千餘里漲海無崖岸船舶未曾得逕過也其市

東西交會日有萬餘人珍物寶貨無所不有

梁書海南
諸夷傳

海南諸國大抵在交州南及西南大海洲上相去或四五千里遠者二三

萬里其西與西域諸國接漢元鼎中遣伏波將軍路博德開百越置日南郡其徼外諸國自武帝以來皆朝貢後漢桓帝世大秦天竺皆由此道遣使貢獻及吳孫權時遣宣化從事朱應中郎康泰通矣其所經過及傳聞則有百數十國因立記傳晉代通中國者蓋鮮故不載史官及宋齊至梁其奉正朔修貢職航海往往至矣

諸南史海
國傳

梁蕭勵爲廣州刺史廣州邊海舊饒外國舶至多爲刺史所侵每年舶至不過三數及勵至纖毫不犯歲十餘至

南史梁
宗室傳

王僧孺爲南海太守郡常有高涼生口及海舶每歲數至外國賈人以通貨易舊時州郡以半價就市其利數倍僧孺並無所收

梁書
本傳

唐

唐始置市舶使以嶺南帥臣監領之設市區令蠻夷來貢者爲市稍收利入官凡舟之來最大者爲獨檣舶能載一千婆蘭胡人謂三百斤爲一婆蘭次曰牛頭

舶比獨檣得三之一又次曰三木舶曰料河舶遞得三之一

謹按此數語顧氏採之宋

史食貨志貞觀十七年詔三路舶司番商販到龍腦沈香丁香白豆蔻四色並

抽解一分武后時都督路元叡冒取番酋貨舶曾不勝忿殺之開元初市

舶使周慶立與波斯僧造奇巧以進効罷又罷遣使者之南海求珠翠者

開元四年有湖人上言南海多珠翠奇寶可往營數因言市舶之利又欲往師子國求靈藥及善醫之姬置之宮掖上命監察御史楊範臣與胡人偕往求之範臣從容奏曰陛下前年焚珠玉錦繡示不復用今所求者何以異於所焚者乎彼市舶與商賈爭利殆非王者之體胡藥之性中國多不能知況於胡姬豈宜置之宮掖夫御史天子耳目之官必有軍國大事臣雖觸冒災瘴死不敢辭此特胡人眩惑求媚無益聖德竊恐非陛下意願熟思之上逮自後於廣州設結好使每番舶至則審事宜以聞時諸番

多所更改林邑號環王而真臘亦號文單皆嘗犯邊元和中安南都護張
舟擊敗之乃復銅柱以正疆場於是貢琛溢於王府其後節度使馬總又
鑄二柱以繼之貞元時波斯波羅二國入貢多珍物節度使王處休奉宣
威德撫令市易常供外一無所取其後以軍興漸加市稅太和中文宗下

詔除之

邵國利
病書

南海舶外國船也每歲至安南廣州師子國舶最大梯上下數丈皆積寶
貨至則本道奏報郡邑爲之喧闐有番長爲主領市舶使藉其各物納舶
腳禁珍異番商有以欺詐入牢獄者

李肇
史補

廣德元年十二月廣州市舶使呂太一反逐其節度使張休

新書代
宗紀

文宗太和八年疾愈德音南海番舶本以慕化而來固在接以恩仁使其

感悅思有矜恤以示綏懷其嶺南福建及揚州番客宜委節度觀察使常

加存問除舶腳收市進奉外任其來往通流自爲交易不得重加率稅

文苑

華英

王方慶拜廣州都督廣州地際南海每歲有崑崙乘舶以珍物與中國交
市舊都督路元睿冒求其貨崑崙懷刃殺之方慶在任數載秋毫不犯

舊書

本傳

柳澤開元中監嶺南選時市舶使右威衛中郎將周慶立造奇器以進澤
上書言慶立雕製詭物造作奇器用浮巧爲珍玩以譎怪爲異寶乃治國
之巨蠹明主所宜嚴罰者也書奏元宗稱善

新書
本傳

王鍔遷廣州刺史嶺南節度使西南大海中諸國舶至則盡沒其利由是

鍔家財富於公藏日發十餘艇重以犀象珠具稱商貨而出諸境周以歲

時循環不絕凡八年

舊書本傳

盧奐爲南海太守遐方之地貪吏斂迹人用安之以爲自開元已來四十年廣州節度清白者有四謂宋璟裴迪先李朝隱及奐中使市舶亦不干

法

舊書盧懷慎傳

徐申進嶺南節度使外番歲以珠璣玳瑁文犀浮海至申於常貢外未嘗

賸索商賈饒盈

新書本傳

李勉除廣州刺史兼嶺南節度使前後西域舶泛海至者歲纔四五勉性廉潔舶來都不檢閱故末年至者四十餘

舊書本傳

孔戣元和十二年拜嶺南節度使番舶泊步有下綰稅始至有閱貨宴所

餉犀琲下及僕隸戮禁絕無所求索舊制海商死者官籍其貲滿三月無妻子詣府則沒入戮以海道歲一往復苟有驗者不爲限悉推與

新書孔集父傳

盧鈞開成元年爲廣州刺史御史大夫嶺南節度使南海有蠻舶之利珍

貨輜輶舊帥作法興利以致富凡爲南海者靡不捆載而還鈞性仁恕爲

政廉潔請監軍領市舶使已一不干預

舊書本傳

韋正貫宣宗立擢嶺南節度使南海舶賈始至大帥必取象犀明珠上珍而售以下直正貫既至無所取吏咨其清

新書章集傳

陸贊論嶺南請於安南置市舶中使狀曰嶺南節度經略使奏近日舶船多往安南市易進奉事大實懼闕供臣今欲差判官就安南收市望定一中使與臣使司同勾當庶免欺隱希顏奉宣聖旨宜依者遠國商販唯利

是求廣州地當要會俗號殷繁交易之徒素所奔輶今忽捨近而趨遠棄中而就偏若非侵刻過深則必招懷失所且嶺南安南莫非王土中使外使悉是王臣若緣軍國所需皆有令式恆制人思奉職孰敢闕供豈必信嶺南而絕安南重中使而輕外使殊失推誠之體又傷賤貨之風望押不出

陸宣公奏議

韓愈送鄭尚書序其海外雜國若耽浮羅流求毛人夷亶之州林邑扶南真臘于陀利之屬東南際天地以萬數或時候風潮朝貢蠻胡賈人舶交海中若嶺南帥得其人則一邊盡治不相寇盜賊殺無風魚之災水旱厲毒之患外國之貨日至珠香象犀瓈瑁奇物溢於中國不可勝用

昌黎集

宋

市舶司掌市易南番諸國物貨航舶而至者初於廣州置司以知州爲使通判爲判官及轉運使司掌其事又遣京朝官三班內侍三人專領之後又於杭州置司淳化中徙置於明州定海縣命監察御史張肅主之明年肅上言非便復於杭州置司咸平中又命杭明州各置司聽番客從便若舶至明州定海縣監官封船答堵送州凡大食古邏闔婆占城勃泥麻逸三佛齊賓同臘沙里亭丹流眉並通貿易以金銀緡錢鉛錫雜色帛精麞瓷器市易香藥犀象珊瑚琥珀珠鏹寶鐵籠皮璫瑪瑙碑磲水晶番布烏楠蘇木之物太平興國初京師置榷易院乃詔諸番國香藥寶貨至廣州交趾泉州兩浙非出於官庫者不得私相市易後又詔民間藥石之具恐或致闕自今惟珠貝璫瑪瑙乳香禁榷外他藥

官市之餘聽市貨與民其後二州知州領使如勸農之制通判兼監而罷
判官之名每歲止三班內侍專掌轉運使亦總領其事大抵海舶至十先
征其一其價直酌番貨輕重而差給之

宋會要

開寶四年六月命同知廣州潘美尹崇珂並充市舶使以駕部員外郎通
判廣州謝處玭兼市舶判官

宋會要

太平興國元年五月詔敢與番客貨易計其直滿一百文以上量科其罪
過十五千以上鯨面配海島過此數者押送赴闕婦人犯者配充針工淳
化五年二月又申其禁四貫以上徒一年遞加二十貫以上鯨面配本地
充役兵

宋會要

太平興國二年正月命著作佐郎李鵬舉充廣南市舶使

宋會要

太平興國七年閏十二月詔聞在京及諸州府人民或少藥物食用今以下項香藥止禁榷廣南漳泉等州舶船上不得侵越州府界紊亂條法如違依條斷遣其在京并諸處卽依舊官場出賣及許人興販凡禁榷物八種瑣玳牙犀賓鐵籠皮珊瑚瑪瑙乳香放通行藥物三十七種木香檳榔石脂硫黃大腹龍腦沈香檀香丁香皮桂胡椒阿魏蒔蘿華澄茄訶子破故紙荳蔻花白荳蔻鵬沙紫礦胡盧芭蘆會草撥益智子海桐皮縮沙高良薑草荳蔻桂心苗沒藥煎香安息香黃熟香烏楠木降真香琥珀後紫礦亦禁榷

宋會要

雍熙二年九月己巳禁海賈

宋史太宗紀

雍熙四年五月遣內侍八人齎勅書金帛分四綱各往海南諸國勾招進

奉博買香藥犀牙珍珠龍腦每綱齋空名詔書三道於所至處賜之

宋會要

淳化二年四月詔廣州市舶每歲商人舶船官盡增常價買之良楷相雜
官益少利自今除禁榷貨外他貨擇良者止市其半如時價給之麤惡者
恣其實勿禁

宋會要

謹按宋史食貨志載此條又云歲約獲五十餘萬斤條株顆

至道元年三月詔廣州市舶司曰朝廷綏撫遠俗禁止末游比來食祿之家不許與民爭利如官吏罔顧憲章苟徇貨財潛通交易闢出徼外私市掌握之珍公行道中靡虞薏苡之謗永言貪冒深蠹彝倫自今宜令諸路轉運司指揮部內州縣專切糾察內外文武官僚敢遺親信於化外販鬻者所在以姓名聞

宋會要

至道元年六月詔市舶司監官及知州通判等今後不得收買番商雜貨及違禁物色如違當重置之法先是南海官員及經過使臣多請託市舶官如傳語番長所買香藥多虧價直至是左正言馮拯奏其事故有此詔

要宋會

大中祥符二年八月九日詔杭廣明州市舶司自今番商齎鑑石至者官爲收市斤給錢五百以初立禁科也時三司定直斤錢二百詔特增其數

要宋會

大中祥符九年九月十八日太常少卿李應機言廣州勾當市舶司使臣自今後望委三司使副使判官或本路轉運使奏廉幹者充選從之要宋會
天禧三年十月供備庫使時其昌言廣州市舶庫門舊令鈴轄監閱望止

於都監押內輪司其事從之

宋會要

天禧四年六月右諫議大夫李應機言廣州通判係審官院差緣兼市舶公事望自今中書選差候得替日如不虧遞年課額特與改官優加任使其市舶使臣亦候得替依押香藥綱使臣例遷轉親民任使詔廣州通判於京朝官中選累有人奏舉者具名取旨其市舶依所請施行

宋會要

天聖五年九月自今遇有舶船到廣州博買香藥及得一兩綱旋具聞奏乞差使臣管押

宋會要

天聖八年七月十六日詔廣州監市舶司使臣自今三班院依據走馬承受使臣

存之

宋會要

例選取三人各會有舉主三人已上者具腳色姓名供身樞密院其差出使臣如在任終滿三年委實廉慎別無公私過犯仍令本路轉運使副保奏當與酬獎要宋會

景祐五年九月七日太常少卿直昭文館任中師言臣在廣州奉勅管勾市舶司使臣三人通判二人亦是管勾市舶司名銜並同勘會所使印是市舶使字乞自今少卿監以上知廣州並兼市舶使入銜內兩通判亦充市舶判官或主轄市舶司事管勾使臣並申狀詔知州徐起兼市舶使今後少卿監已上知州兼市舶使餘不行要宋會

仁宗時詔杭明廣三州置市舶司海舶至者視所載十算其一而市其三海舶歲入象犀珠玉香藥之類皇祐中總其數五十三萬有餘文獻考

熙寧四年五月十二日詔應廣州市舶司每年抽買到乳香雜藥依條計綱申轉運司召差廣南東西路得替官往廣州交管押上京送納事故充替之人勿差至元符三年六月十一日廣東轉運司奏欲於上京送納字下添入如逐路無官願就卽不限路分官員並許召差如無官仍約定綱數申省乞差軍大將裝押字從之

宋會要

熙寧七年正月一日詔諸舶船遇風信不便飄至逐州界速申所在官司城下委知州餘委通判或職官與本縣令佐躬親點檢除不係禁物稅訖給付外其係禁物卽封堵差人押赴隨近市舶司勾收抽買諸泉福緣海州有南番海南物貨船到並取公據驗認如已經抽買有稅務給到回引卽許通行若無照證及買得未經抽買物貨卽押赴隨近市舶司勘驗施

行諸客人買到抽解下物貨並於市舶司請公憑引目許往外州貨賣如不出引目許人告依偷稅法宋會要

熙寧七年七月十八日詔廣東路提舉司劾廣州市易務勾當公事呂邈以擅入市舶司拘攔番商物故也十九日詔廣州市舶司依舊存畱更不併歸市易務宋會要

併歸市易務

宋會要

熙寧九年五月二日中書門下言給事中集賢殿修撰程師孟乞罷杭州明州市舶司只就廣州市舶司一處抽解欲令師孟赴三司同共詳議利害以聞三司言今與師孟同共詳議明廣州市舶利害先次刪立抽解條約詔恐逐州有未盡未便事件令更取索重詳定施行宋會要

元豐三年八月二十七日中書言廣州市舶條已修定乞專委官推行詔

廣東以轉運使孫迥廣西以轉運使陳倩兩浙以轉運副使周直孺福建
以轉運判官王子京迥直孺兼提舉推行倩子京兼覺察拘攔其廣南東
路安撫使更不帶市舶使

要宋會

元豐五年十月十七日廣東轉運副使兼提舉市舶司孫迥言南番綱首
持三佛齊詹畢國主及主管國事國主之女唐字書寄臣熟龍腦二百二
十七兩布十三疋臣昨奉委推行市舶法臣以海舶法敝商旅輕於冒禁
每召賈胡示以條約曉之以來遠之意今幸刑戮不加而來者相繼前件
書物等臣不敢受乞估直入官委本庫買綵帛物等候各船回報謝之所
貴通異域之情來海外之貨從之

要宋會

元豐五年十二月二十一日廣西轉運副使吳潛言雷化發船之地與瓊

島相對今令倒下廣州請引約五千里不便欲乞廣西沿海一帶州縣如土人客人以船載米穀牛酒黃魚及非市舶司抽解之物並更不下廣州請引詔孫迴相度於市舶法有無妨礙

宋會要

元祐元年杭明廣三州市舶是年收錢糧銀香藥等五十四萬一百七十三緡匹斤兩段條箇顆躋隻粒支二十三萬八千五十六緡匹斤兩段條

箇顆躋隻粒

文獻通考

元祐五年十一月二十九日刑部言商賈許由海道往來番商興販並具入舶物貨名數所詣去處申所在州仍召本土物力戶三人委保州爲驗實牒送願發舶州置簿給公據聽行回日許於合發舶州住舶公據納市舶司卽不請公據而擅乘舶自海道入界河及往高麗新羅登萊州界者

徒二年五百里編管往北界者加二等配一千里並許人告捕給舶物半價充賞其餘在舶人雖非船物主並杖八十卽不請公據而未行者徒一年鄰州編管賞減擅行之半保人並減犯人三等從之

宋會要

元符二年五月十二日戶部言番舶爲風飄著沿海州界若損敗及舶主不在官爲拯救錄物貨許其親屬召保認還及立防守盜縱詐冒斷罪法從之

宋會要

崇寧三年五月二十八日詔應番國及土生番客願往他州或東京販易物貨者仰經提舉市舶司陳狀本司勘驗詣實給與公憑前路照會經過官司常切覺察不得夾帶禁物及姦細之人其餘應有關防約束事件令本路市舶司相度申上書省先是廣南路提舉市舶司言自來海外諸國

番客將寶貨渡海赴廣州市舶務抽解舉民閒交易聽其往還許其居止
今來大食諸國番客乞往諸州及東京買賣未有條約故有是詔

宋會要

崇寧四年五月二十日詔每年番船到岸應買到物貨合行出賣並將在
市實直價例依市易法通融收息不得過二分從廣南提舉市舶司請也

宋會要

崇寧五年三月四日詔廣州市舶司舊來發舶往來南番諸國博易回元
豐三年舊條只得卻赴廣州抽解後來續降沿革不同今則許於非元發
舶州往舶抽買緣此大生奸弊虧損課額可將元豐三年八月舊條與後
來續降衝改參詳從長立法遵守施行

宋會要

大觀元年三月十七日詔廣南福建兩浙市舶依舊復置提舉官

宋會要

政和四年五月十八日詔諸國番客到中國居住已經五世其財產依海行無合承分人及不經遺屬者並依戶絕法仍入市舶司拘管

要會

宣和三年十一月二十六日詔諸路市舶本錢並依茶鹽錢已得指揮

宋會

要

宣和四年五月九日詔應諸番國進奉物依元豐法更不起發就本處出賣倘敢違戾市舶司官以自盜論

要會

宣和七年三月十八日詔降給空名度牒廣南福建路各五百道兩浙路三百道付逐路市舶司充折博本錢仍每月具博買并抽解到數目申尙

書省

宋會

粵海關志卷二終

粵海關志卷三

前代事實二

宋

建炎元年六月十三日詔市舶司多以無用之物枉費國用取悅權近自今有以篤耨香指環瑪瑙貓兒眼睛之類博買前來及有虧番商者皆重置其罪令提刑司按舉聞奏宋會要

建炎元年十月二十三日承議郎李則言閩廣市舶舊法置場抽解分爲麞細二色般運入京其餘麞重難起發之物本州打套出賣自大觀以來乃置庫收受務廣帑藏張大數目其弊非一舊係細色綱只是珍珠龍腦之類每一綱五千兩其餘如犀牙紫礦乳香檀香之類盡係麞色綱每綱

一萬斤凡起一綱差衙前一名管押支腳乘贍家錢約計一百餘貫大觀
已後犀牙紫礦之類皆變作細色則是舊日一綱分之爲十二綱多費官
中腳乘贍家錢三千餘貫乞將前項抽解麤色並令本州依時價打套出
賣盡作見錢樁管許諸客人就行在中納見錢齎執兌便關子前來本州
支請詔依舊餘依所乞

宋會要

建炎四年二月二十六日尙書省言廣南路提舉市舶司言檢准勅節文
廣南市舶司狀廣州市舶庫逐日收支寶貨錢物浩瀚全藉監門官檢察
欲乞許從本司奏准無贓私罪文武官充廣州市舶庫監門庶幾得人檢
察杜絕侵盜之弊從之

宋會要

建炎四年六月二十二日詔諸路市舶司錢物今後並不許諸司官剗刷

如違以徒二年科罪

宋會要

紹興元年七月二十日提舉廣南市舶張書言上言閩婆番首勤堅附到番信與廣州知州並提舉市舶官未敢收受詔不許如願中賣卽依數支還價錢不得兩有虧損

宋會要

紹興元年十一月二十六日提舉廣南路市舶張書言言契勘大食人使蒲亞里所進大象牙二百九株大犀三十五株在廣州市舶庫收管緣前件象牙各係五七十斤以上依市舶條例每斤價錢二貫六百文九十四陌約用本錢五萬餘貫文省欲望詳酌如數目稍多行在難以變轉卽乞指揮起發一半令本司委官秤估將一半就便搭息出賣取錢添同給還蒲亞里本錢詔令張書言揀選大象牙一百株并犀二十五株起發赴行

在准備解笏造帶宣賜臣僚使用餘依

宋會要

紹興二年四月二十六日戶部言據提舉廣南路市舶張書言劄子近年以來不蒙朝廷給降本錢而轉運司又取撥過本公司見錢五萬貫文見今委實闕乏詔令禮部給降廣東路空名度牒三百道紫衣兩字師號各一百道撥還本公司充博買本錢支用

宋會要

紹興二年六月二十一日廣南東路經略安撫提舉市舶司言廣州自祖宗以來興置市舶收課入倍於他路每年發舶月分支破官錢管設津遣其番漢綱首作頭梢工等人各令與坐無不得其懼心非特營辦課利蓋欲招徠外夷以致柔遠之意舊來或遇發船眾多及進貢之國併至量增添錢數亦不滿二百餘貫費用不多所說者眾今准建炎二年七月勅備

坐前提舉兩浙市舶吳說劄子每年宴犒諸州所費不下三千餘貫委是枉費緣吳說卽不曾取會本路設番所費數目例蒙指揮寢罷竊慮無以招懷遠人有違祖宗故事欲乞依舊犒設從之

要會

紹興三年七月一日詔廣南東路提舉市舶官今後遵守祖宗舊制將中國有用之物如乳香藥物及民間常使香貨並多數博買內乳香一色客算尤廣所差官自當體國招誘博買仍令戶部限三日將市舶司抽解博買舊法參酌重別立定殿最賞罰條格具狀申尙書省以尙書省言提舉官往往非其人致番商稀少理合講究故也

要會

紹興三年八月二十二日新差提舉廣南路市舶姚焯言蒙恩付以南海舶事唯番商物貨之職而已他不與焉今赴新任竊恐入境已後或見本

路民聞有的實利病乞依守臣五事例得以條具聞奏庶幾遠民咸喻德意從之宋會要

紹興三年九月九日詔廣南市舶庫錢物除朝廷指定取合應付外其餘官司今後並不得取撥支使雖奉特旨亦聽本司執奏不行提舉姚焯言本司錢本多爲轉運司畫旨取撥致無以應副番商故也宋會要

紹興三年十一月十二日戶部言諸路收買市舶司博易物色本錢欲依舊用坊場錢應副從之宋會要

紹興三年十二月十七日戶部言勘會三路市舶除依條抽解外番商販到乳香一色及牛皮筋角堪造軍器之物自當盡行博買其餘物貨若不權宜立定所起發窠名竊慮枉費腳乘欲令三路市舶司將今來立定名

色計置起發下項名件欲令起發赴行在送納金銀珍珠玉乳香牛皮筋
角象牙犀腦子麝香沉香上中次箋香檀香烏文木鵬砂朱砂木香人參
丁香琉璃珊瑚蘇合油白荳蔻牛黃臍肭臍龍涎香藤黃血碣華澄茄安
息香縮砂降真香肉荳蔻訶子舶上茴香茯苓普薩香鹿茸黑附子油腦
蓀蓉琥珀上等螺犀中等螺犀下等螺犀水銀上等藥犀中等藥犀下等
藥犀鹿速香赤倉腦米腦腦泥木扎腦夾雜銀石碌白附子銅器銀硃苛
子南蕃蘇木高州蘇木隨風子青木香乾薑川芎紅花雄黃川椒石鍾乳
璫黃白朮夾雜黃熟香頭上等生香茴香烏牛角白牛角沙魚皮上等鹿
皮魚膠海南蘇木熟速香畫黃龜鼈皮魚鱠榔心簾番小花狹簾菱牙簾
番顯布海南碁盤布海南吉貝布海南青花碁盤皮單下色絳香海南白

布海南白布皮單揀香上色餅乳香中色餅香次下色餅香上色袋香中色袋香下色袋香乳香塌香黑塌香水溼黑塌香青碁盤布細生速香研削揀選低下水溼黑塌香黃蠟松子榛子夾煎黃熟香頭白蕪荑山茱萸茅朮防風杏仁五苓脂黃芪土牛膝毛絕布高麗小布占城速香生熟香夾煎香上黃熟香中黃熟香下箋香石斛下項名件欲令本處一面變賣薔薇水御碌香蘆薈阿魏華撥史君子荳蔻花肉桂桂花指環腦丁香扶律膏大楓油加路香火丹子紫藤香薦芹子荳蔻黑薦轉龜童沒藥天南星青桂頭秦皮橘皮鼈甲蒔蘿官桂榆甘子益智高良薑甲香天竺黃草荳蔻藿香紅荳草菓大腹子肉破故紙芩香蓬莪朮子鼈子石決明木蘭皮丁香皮殼荳蔻烏藥柳桂桂皮檀香皮薑黃相思子蒼朮青椿香幽

香桂心大片香薑黃熟纏末潮腦三賴子龜頭枝實密木檀香纏丁香枝
白膠香椿香頭鷄骨香龜同香白芷亞溼香木蘭茸烏黑香麞熟香下等
丁香下等冒頭香下等麞香頭下等青桂片香麝香木蕃檳榔肉連皮檳
榔舊香連皮大腹麞熟香頭海桐皮松搭子犀蹄土牛夏常山蕤仁遠志
暫香下速香下黃熟香詔依宋要會

紹興五年閏二月八日詔市舶務監官并見任官詭名買市舶司及彊買
客旅舶貨以違制論仍不以赦降原減許人告賞錢一百貫提舉官知通
不舉劾減犯人罪二等宋要會

紹興七年閏十月三日上曰市舶之利最厚若措置合宜所得動以百萬
計豈不勝取之於民朕所以畱意於此庶幾可以少寬民力爾先是詔令

知廣州連南夫條具市舶之弊南夫奏至其一項市舶司全藉番商來往
貨易而大商蒲亞里者既至廣州有右武大夫會納利其財以妹嫁之亞
里因畱不歸上今委南夫勸誘亞里歸國往來幹運番貨故諭及之

宋會要

紹興八年七月十六日臣寮言廣南福建兩浙市舶司抽買到市舶香藥

物貨依紹興六年四月九日朝旨立定合起發本色并令本處一面變轉
價錢赴行在送納名件緣合起發內尙有民間使用稀少等名色若行起
發竊慮枉費腳乘及虧損官錢詔令逐路市舶司如抽買到和劑局無用
并臨安府民間使用稀少物貨更不起發本色一面變轉價錢赴行在庫
務送納內廣南福建路仍起輕賚

宋會要

紹興十一年十一月戶部言重行裁定市舶香藥名色仰依合起發名件

須管依限起發前來所是本處變賣物貨除將自來條格內該載合充循
環本錢外其餘遵依已降指揮計置起發施行不管違戾合赴行在送納
可以出賣物色細色訶子中箋香沒藥破故紙丁香木香茴香茯苓玳瑁
鵬砂蒔蘿紫礦瑪瑙水銀天竺黃末硃砂人參鼈皮銀子下箋香芹子銅
器銀硃熟速香帶根丁香桔梗澤瀉茯神金舶上茴香中熟速香玉乳香
麝香夾雜金夾雜銀沉香上箋香次箋香鹿茸珊瑚蘇合油牛黃血竭臘
肭臍龍涎香華澄茄安息香琥珀雄黃鍾乳石薑薇水蘆薈阿魏黑篤耨
鼈甲篤耨香皮篤耨香沒石子雌黃鷄舌香香螺奄葫蘆芭翡翠金顏香
畫黃白荳蔻龍腦有九等熟腦梅花腦白蒼腦油腦赤蒼腦泥鹿速腦
木孔腦龜色胡椒檀香夾箋香黃蠟黃熟香吉貝布礪面布香米縮砂乾

薑蓬莪朶生香斷白香藿香華撥益智木鼈子降眞香桂皮木棉史君子
肉荳蔻檳榔青橘皮小布大布白錫甘草荆三稜碎箋香防風蒟醬次黃
熟香烏里香芩苓香中黃熟香冒頭香三賴子青苧布下生香丁香海桐
皮番青班布下等冒頭香下等五里香芩牙簾修割香中生香白附子白
熟布白細布山桂皮暫香帶枝檀香鉛土茴香烏香牛齒香半夏芎藭布
石碌紫藤香官桂桂花花藤麤香紅荳高良薑藤黃黃熟香頭釵藤黃熟
香片螺頭斬剉香生香片水藤皮蒼朶紅花片藤璠璃水盤頭赤魚鱠香
纏小片水盤頭杏仁紅橘皮二香大片香糖霜天南星松子龜小布大片
水盤香中水盤香璋腦青桂香斧口香白苧布鞋面布丁香皮草菓生苧
布土檀香青花番布蓀蓉螺犀隨風子細丁海母龜同亞溼香菩提子鹿

角蛤蚧洗銀硃花梨木璠琉珠椰心簾犀蹄番糖師子綏枝實籠重枉費
腳乘窯木大蘇木小蘇木硫磺白藤棒修截香青桂頭香番蘇木次下蘇
木海南蘇木鑊鐵白藤籠鐵水藤坯子大腹子薑黃麝香木跳子鷄骨香
大腹檀香皮把麻倭板倭枋板頭薄板板掘短板肩椰子長薄板合簾火
丹子蛙姑乾倭合山枝子白檀木黃丹麝檀木苧麻蘇木稍駁相思子倭
梨木檻藤子滑皮松香螺殼連皮大腹吉貝花布吉貝紗瓊枝萊砂黃籠
生香琉璃泥黃木柱短小零板杉枋厚板松枋海松板木枋厚板令赤藤
厚枋海松枋長小零板板頭松花小螺殼籠黑小布杉板狹小枋令團合
雜木柱枝條蘇木水藤篾三抄香團鐵珠蘇木腳生羊梗黃絲火欒煎
盤黑附子油腦藥犀青木香白朮番小花狹簾海南白布單青番碁盤小

布白蕪荑山茱萸茅朮五苓脂黃芪毛施布生熟香石斛大楓油秦皮草
荳蔻烏藥香白芷木蘭茴蕤仁遠志海螺皮生薑黃芩龍骨草枕頭土琥
珀冷瓶密木白眼香鬢香鐵熨斗土鍋荳蔻花砂魚皮拍還腦香柏皮黃
漆滑石蔓荆子金毛狗脊五加皮榆甘子菖蒲土牛膝甲香加路香石花
菜蠶絲繭頭大價香五倍細辛韶腦舊香御碌香大楓水檀香皮纏香皮
纏末大食芎崕梅董陸香召亭枝龜頭犀香荳根白腦香生香片船上蘇
木水盤頭幽香番頭布海南碁盤布海南青花布皮單長木長倭條短板
肩二十三日臣寮言廣東福建路轉運司遇舶船起發差本司屬官一員
臨時點檢仍差不干礙官一員覺察至海口俟其放洋方得回歸如所委
官或縱容般載銅錢並乞顯罰以爲慢令之戒詔下刑部立法刑部立到

法諸舶船起發

販番及外番進奉人使同番船同

所屬先報轉運司差不干礙官一員躬

親點檢不得夾帶銅錢出中國界仍差通判一員

謂不干預市舶職事者謂獨員或差委清疆官

覆視候其船放洋方得回歸諸舶船起發

販番及外番進奉人使同番船同

所委點檢官

覆視官同容縱夾帶銅錢出中國界首者依知情引領停藏負載人法

失覺

二等察者減卽覆視官不候其船放洋而輒回者徒一年從之

宋會要

紹興十四年九月六日提舉福建路市舶樓璿言臣昨任廣南市舶司每

年於十月內依例支破官錢三百貫文排辦筵宴係本司提舉官同守臣

犒設諸國番商等今來福建市舶司每年止量支錢委市舶監官備辦宴

設委是禮意與廣南不同欲乞依廣南市舶司體例每年於遣發番舶之

際宴設諸國番商以示朝廷招徠遠人之意從之

宋會要

紹興十六年九月二十五日宰執進呈廣南市舶司繳進三佛齊國王寄市舶官書且言近年商販乳香頗有虧損上曰市舶之利頗助國用宜循舊法以招徠遠人阜通貨賄於是降右朝散大夫提舉福建路常平茶事袁復一官以前任廣南市舶虧損番商物價故有是命

宋會要

紹興十七年十一月四日詔三路市舶司今後番商販到龍腦沉香丁香白荳蔻四色並依舊抽解一分餘數依舊法施行先是紹興十四年一時措置抽解四分以市舶司言番商陳訴抽解太重故降是旨

宋會要

紹興二十一年七月八日廣南市舶司言廣州通判二員主管市舶職事比之幹辦公事職事爲簡乞將通判賞減定依幹辦公事官一等推賞詔下本司上差通判一員主管市舶職事其賞依本司所乞與幹辦公事一

等比監官條法減半推賞施行

宋會要

紹興二十七年六月一日宰執進呈戶部措置廣南銅錢出界事上曰廣南市舶司遞年有番商息錢如及額許補官此祖宗舊制前兩年有陳乞推恩人朝廷不與恐緣此番商不至今後可與依舊制推恩卽非創立法

制宋會要

紹興二十九年九月二日宰執進呈御史臺檢法官張闡論市舶事上曰廣南福建兩浙三路市舶條法恐各不同宜令逐司先次開具來上當委官詳定朕嘗問闡市舶司歲入幾何闡奏抽解與和買以歲計之約得二百緡如此卽三路所入固已不少皆在常賦之外未知戶部如何收附及如何支使卿等宜取見實數以聞湯思退奏曰謹當遵依聖訓行下逐路

舶司鈔錄條法并令取見收支實數俟到條數聞奏以御史臺檢法官張闡言比者叨領舶司僅及二載竊嘗求其利害之灼然者無若法令之未修何當福建廣南各置務於一州兩浙市舶務及分建於五所三路市舶相去各數千里初無一定之法或本於一司之申請而他司有不及知或出於一時之建明而異時有不可用監官之或專或兼人吏之或多或少寡待夷夏之商或同而或異立賞罰之制或重而或輕以至住舶於非發舶之所有禁有不禁買物於非產物之地有許有不許若此之類不可概舉故官吏無所遵守商賈莫知適從姦吏舞文遠人被害其爲患深欲望有司取前後累降指揮及三路節次申請釐析刪修著爲一司條制故上諭及之

宋會要

隆興元年十二月十三日臣僚言舶船物貨已經抽解不許再行收稅係是舊法緣近來州郡密令場務勒商人將抽解餘物重稅卻致冒法透漏所失倍多宜行約束庶官私無虧興販益廣戶部看詳在法應抽解物不出州界貨賣更行收稅者以違制論不以去官赦降原減欲下廣州福建兩浙轉運司并市舶司鈐束所屬州縣場務遵守見行條法指揮施行從之

宋會要

隆興二年七月二十五日臣僚言熙寧初創立市舶一司所以來遠人通物貨也舊法抽解既定數又寬期納稅使之待價此招致之方也邇來州郡官吏趣辦抽解之外又多名邑兼迫其輸納貨滯則減價求售所得無幾恐商旅自此不行欲望戒勅州郡推明神宗皇帝立法之意使商賈懋

遷以助國用從之繼而戶部欲行廣南福建兩浙路轉運司并市舶司鈐束所屬州縣場務遵守見行條法施行毋致違戾

宋會要

謹按此條是開寶時所置市舶司猶循唐制至新法旣行乃置爲司也乾道三年四月二十二日詔廣南兩浙市舶司所發船回日內有妄託風水不便船身破漏檣柂損壞卽不得拘截抽解若有別路市舶司所發船前來泉州亦不得拘截卽委官押發離岸回元來請公驗去處抽解從福建路市舶程祐之請也

宋會要
乾道七年十月十三日詔今後廣南市舶司起發蠶色香藥物貨每綱一二萬斤正六百斤耗爲一綱依舊例支破水腳錢一千六百六十二貫三百三十七文省限五箇月到行在交納如別無欠損違限與依押乳香三

十斤推賞其差募官管押等並依見行條法指揮從戶部尙書曾懷之請

也宋會要

乾道九年七月十二日詔廣南路提舉市舶司申乞於瓊州置主管官指揮更不施行先是提舉黃良心言欲創置廣南路提舉市舶司主管官一員專一覺察市舶之弊并催趕回舶抽解於瓊州置司臣僚言昔貞元中嶺南以舶船多往安南欲差判官往安南收市陸贊以謂示貪風於天下其事遂寢遣官收市猶不可況設官以漁利乎故有是命宋會要

淳熙二年二月二十七日戶部言市舶司管押綱運官推賞今措置欲令福建廣南路市舶司麤細物貨並以五萬斤爲一全綱福建限三月程廣南限六月程到行在無欠損與比倣押錢帛指揮推賞如不及全綱以五

斤爲則作十分組計亦依押錢帛綱地里格法等第推賞從之

宋會要

開禧元年八月九日提轄行在權貨務都茶場趙善謐言泉廣招買乳香緣舶司闕乏不隨時支還本錢或官吏除剋致有規避博買詐作飄風前來明秀江陰舶司巧作他物抽解收稅私賣攬奪國課乞下廣福市舶司多方招誘申給度牒變賣給還價錢仍下明秀江陰三市舶遇番船回舶乳香到岸盡數博買不得容令私賣從之

宋會要

開禧元年十月十一日詔泉州廣市舶司將逐年博買番商乳香自開禧二年爲始權住博買

宋會要

開禧三年正月七日前知南雄州竈周臣言泉廣各置舶司以通番商比年番船抵岸既有抽解合許從便貨賣今所隸官司擇其精者售以低價

諸司官屬復相囑託名曰和買獲利既薄怨望愈深所以比年番船頗疎
征稅暗損乞申飭泉廣市舶司照條抽解和買入官外其餘貨物不得毫
髮拘畱巧作名色違法抑買如違許番商越訴犯者計贓坐罪仍令近監

司專一覺察從之

宋會要

嘉定六年四月七日兩浙轉運司言臨安府市舶務有客人於泉廣番名
下轉買已經抽解胡椒降真香縮砂荳蔻藿香等物給到泉廣市舶司公
引立定限日指往臨安府市舶務住賣從例係市舶務收索公引具申本
司委通判主管官點檢比照元引色額數目一同發赴臨安府都稅務收
稅放行出賣如有不同并引外出剩之數卽照條抽解將收到錢分隸起
發上供今承指揮舶船到臨安府不得抽解收稅差人押回有舶司州軍

卽未審前項轉販泉廣已經抽解有引物貨船隻合與不合抽解收稅詔
令戶部今後不得出給興販海南物貨公憑許回臨安府抽解如有日前
已經出給公憑客人到來並勒赴慶元府住舶應客人日後欲陳乞往海
南州軍興販止許經慶元府給公憑申轉運司照條施行自餘州軍不得
出給其自泉州廣轉買到香貨等物許經本路市舶司給引赴臨安府市舶
務抽解住賣卽不得將元來船隻再販物貨往泉州廣州軍仍令臨安府轉
運司一體禁戢從之

宋會要

謹按宋制於廣州明州杭州皆置市舶司後又置於泉州南渡後又增
秀州溫州江陰軍今惟取會要中所載廣州市舶著於篇餘皆略之以
明限斷

明杭廣州市舶司博到乳香計三十五萬四千四百四十九斤

過香附廣

三司賣

州

熙寧十年帳內不開說係用是何錢物博買到

收三十四萬八千六百七十三斤

十四色瓶香二十一萬七千

五百九十五斤三袋香一千萬四千九百六十斤黑場香一千萬五千四

西南香價西香六等

同乾每斤三貫三百文第一等回乾瓶香每斤三貫

纏每斤一貫二百文回纏末每斤三百文

南香六等

揀上第一等瓶香每斤四貫

貫二百文回紗纏末每斤三百文

一南香六等

揀上第一等瓶香每斤四

斤三貫八百文第二等每斤三貫三百文第三等每斤二

元豐元年香藥庫見在香一百二十斤

三司三年出賣

計八十九萬四千七百一十九貫三百五文

元豐元年香藥庫見在香一百二十斤

市易務下見在香九千

熙寧九年三十二萬七千六百六貫一百四十七

市易務二十七斤見在

熙寧九年三十二萬七千六百六貫一百四十七

文市易務二十二萬六千六百七十五貫九百六十八文外州軍關到錢

五萬五千六十二貫六百九十五文雜買場關到錢五萬七千六百五

文內除藥錢一萬一千七百九十一貫三千三萬九千三百九十七貫九百九

貫十

數熙寧三十一年三千三百七十四貫二百四文

市易錢七千三百七十七貫

八百四十八文上界還到一萬七千九百一十四貫八百三十八文外州軍關到賣過密州板橋鎮香三萬七千九百一十四貫八百三十八文外州軍關到賣

關錢四萬五千五百八十八貫九百五十三貫

六百一十五文雜買場

元豐元年二十五萬

三千七百三十八貫九百五十四文

市易務一千九萬二千三百七十五貫五百二十四文上界關到賣過密

州板橋鎮香二萬一百六十一貫七百一文雜買場關到錢八千七百一十三萬三千

畢備對中

謹按備對所言三州市舶司乳香三十五萬四千四百四十九斤其內

明州所收惟四千七百三十九斤杭州所收惟六百三十七斤而廣州

收者則有三十四萬八千六百七十三斤是雖三處置司實祇廣州最

盛也

白敏中知廣州兼掌市舶至荆南預市藥物以往在任無所須

宋史本傳

楊覃知廣州南海有番舶之利前後牧守或致謗議惟覃以廉著

宋史本傳

馬亮知廣州時海舶久不至使招來之明年至者倍其初珍貨大集

宋史本傳

張田知廣州臨政以清女弟聘馬軍帥王凱欲售珠犀於廣顧曰南海富

諸物但身爲市舶使不欲自汚爾

宋史本傳

王渙之知廣州番客殺奴市舶使據舊比止送其長杖笞渙之不可論如法

宋史本傳

粵海關志卷三終

粵海關志卷四

前代事實三

元

世祖定江南凡鄰海諸郡與番國往返互易舶貨者其貨以十分取一蟲者以十五分取一以市舶官主之

王
獻通考續文

至元十五年八月辛未詔行中書省唆都蒲壽庚等曰諸番國列居東南島嶼皆有慕義之心可因番舶諸人宣布朕意誠能來朝者朕將寵禮之其往來互市各從所欲

元史
祖紀
世

至元二十三年十一月改廣東轉運市舶提舉司爲鹽課市舶提舉司隸

廣東宣慰司

元史
百

至元二十五年禁廣州官民毋得運米至占城諸國出糶

元史食貨志

至元二十九年命市舶驗貨抽分中書省定抽分之數及漏稅之法賣者細色於二十五分之中取一廳色於三十分之中取一免其輸稅其就市舶司買者止於賣處收稅而不再抽漏舶物貨依例斷沒三十年又定市舶抽分雜禁凡二十一條

元史食貨志

至元三十年四月廣東置市舶司

元史世祖紀

至元三十年立海南博易提舉司至大四年罷之禁下番船隻延祐元年弛其禁改立泉州廣東慶元三市舶提舉司每司提舉二員從五品同提

舉二員從六品副提舉二員從七品知事一員

元史百官志

至元三十一年十一月罷海南海南市舶提舉司

元史世祖紀

元貞二年八月丁酉禁舶商毋以金銀過海諸使海外國者不得爲商

元史

紀成宗

至大二年罷行泉州院以市舶提舉司隸行省四年又罷之延祐元年復立市舶提舉司仍禁人下番官自發船貿易回帆之日細物十分抽二蠶物十五分抽二七年以下番之人將細絲銀易於外國人并提舉司罷之至治二年復立泉州慶元廣東三處提舉司申嚴市舶之禁三年聽商貿易歸徵其稅泰定元年諸海舶至者止令行省抽分

元史食貨志

延祐七年五月辛卯遣使權廣東番貨

元史仁宗紀

元世祖嘗立提舉司尋罷至英宗至治六年遣使權廣東番貨乃復立之聽海商貿易歸徵其稅順帝元統六年罷廣東提舉二司至正二年復立

廣東提舉司申嚴市舶之禁三年總貿易歸征其稅

郡國利病書

市舶禁金銀過海又禁香木又禁廣州官民毋得運米至占城諸番出糶
違者罪之至官自具船給本運人入番貿易諸貨其息以十分爲率官取
其七民得其三仁宗延祐七年以下番將絲銀細物易於外國罷市舶司
提舉司禁賈人下番貨然順帝時中書省發兩艦船下海通番爲皇后營

利續文獻

合并市舶轉運司 至元二十三年三月御史臺承奉中書省劄付爲盧
右丞建言市舶等事移准上都中書省咨六月二十九日本省官奏過內
一件這課程的勾當裏兩件兒勾當有一件勾當盧市舶司的勾當係官
錢裏一十萬定要了他著海船裏交做買賣行別箇民戶做買賣的每休

交行麼道奏來去近眾官人每老的每等官司做買賣的罷了百姓做買賣的每市舶的勾當做者依著在先體例裏要課程抽分者市舶司根底轉運司裏合併道來麼道奏呵那般者麼道聖旨了也欽此

元典
章

市舶則法二十三條　至元三十年八月二十五日福建行省准中書省咨至元二十八年八月二十六日奏過事內一件南人燕參政說有市舶司的勾當是國家大得濟的勾當有在先亡宋時分海裏百姓每船隻做買賣來呵他每根底客人一般敬重看呵咱每這田地無用的傘磨合羅磁器家事簾子這般與了博換他每中用的物件來近來忙兀臺沙不丁等自己根尋利息上頭船每來呵教軍每看守著將他每的船封了好細財物選擇要了爲這般柰何上頭那壁的船隻不出來有咱每這裏入去

來的每些小來爲那上頭市舶司的勾當壞了有如今亡宋時分理會的市舶司勾當的人每有也委付著那的每市舶司勾當教整治呵得濟有畱狀元也說來市舶司的勾當亡宋時分限大得濟來如今壞了有那時分理會的市舶司勾當那箇限底問著行呵大得濟有麼道說有奏呵是那般也者那人每根底說話者是呵行者麼道聖旨了也欽此訪聞得畱狀元稱知市舶人員李晞顏移江浙准行省咨根訪到前行大司農司丞李晞顏報到亡宋抽分市舶則例合設司存關防情節備細令行泉州司比照目今抽分則例逐一議擬於後及令知會市舶人李晞顏前去咨請照驗事准此令李晞顏報到亡宋市舶則例會集到各處行省官行泉州司官并畱狀元及知市舶人李晞顏議擬到下項事理于至元三十年四

月十三日奏過事內爲江南地面裏有的市舶司上頭去年賽因囊加歹
狀元等題說在先亡宋時分市舶司的錢物多出辦來自歸附之後權豪
富戶每壞了市舶司的勾當出辦的錢物入官限少有道是呵亡宋時分
市舶司勾當裏行來的蠻子李晞顏小名的人他根底教來商量呵怎生
奏呵那般者聖旨了來那人根底教來了眾人與理會得的每一處商量
來如今合整治市舶司勾當的有二十三件勾當商量來奏呵那般者行
者聖旨了也欽此都省今將合行逐項事理開坐前去咨請欽依禁治施
行

一議得市舶抽分則例若依亡宋例抽解竊恐舶商生受比及定奪以來
止依目今定例抽分贓貨十五分中一分細貨十分中一分所據廣東

溫州澉浦上海慶元等處市舶司舶商回帆已經抽解訖貨物並依泉州見行體例從市舶司更於抽訖貨物內以三十分爲率抽要舶稅錢一分通行結課搬販客人從便請給文遣買到已抽經稅貨物於杭州等處貨賣卽於商稅務內投稅憑所齎文遺數目依例收稅驗至元二十九年杭州市舶司實抽辦貨物價錢於杭州商稅務課額上依數添加作額恢辦將杭州市舶司革罷將元管錢帛等物行泉州司明白交收爲主爲此於至元三十年四月十三日奏過事內一件江南地面裏泉州上海澉浦溫州慶元廣東杭州七處市舶司有這市舶司裏要抽分呵粗貨十五分中要一分細貨十分中要一分有泉州市舶司裏這般抽分了的後頭又三十分裏官要一分稅來然後不揀那地面裏賣

去呵又要稅有其餘市舶司裏似泉州一般三十分要一分稅的無有如今其餘市舶司依泉州體例裏要者溫州的市舶司并入慶元杭州市舶司并入杭州稅務裏的怎生商量來奏呵那般者聖旨了也

一議得拘該市舶司去處行省官行泉州司官市舶司官在先坐往勒令舶商戶計梢帶錢本下番回舶時將貴細物貨賤估價錢准折重取利息及不依例抽解官課又通同隱瞞虧損公私爲此於至元三十年四月十三日奏過事內一件行省官人每行泉州司官人每市舶司官人每百姓每的做買賣去的船裏交梢帶著自己的錢物去回來呵那錢物內不與官私抽分私下要有那船每也則他每占著抽分全不交與官有今後這般百姓的船梢帶去的禁治呵怎生不揀是誰別了這

言語稍帶將錢物去呵有人告呵將那錢物斷沒了把他每重要了罪過教勾當裏出去了首告的人根底斷沒了的錢內三分中一分充賞與呵怎生商量來奏呵是也那般者聖旨了也

一議得使臣并大小官吏軍民人等因公往海外諸番勾當皆是官司措辦氣力船隻前去卻有因而做買賣之人今後回船之時應有市舶物貨並仰於市舶司照例抽分納官如有進呈希罕貴細之物亦仰經由市舶司見數泉州府司具呈行省行省開坐移咨中書省聞奏仍仰今後應有過番使臣卻不得以進呈物貨爲名隱瞞抽分如違並以漏舶治罪物貨沒官爲此於至元三十年四月十三日奏過事內一件或是這裏差出的使臣每那裏拜見上來的麼道因著那般夾帶著百姓每的

錢物不與官司抽分那般行的多有今後但那來的依著百姓每的體例裏要抽分若有拜見的物呵那裏行泉州司裏行省裏明白這些箇物件拜見上去麼道寫了數目把那寫來的數目與將這裏來者似在前一般不與抽分背地裏隱藏上來的有罪過者商量奏呵是也那般者聖旨了也

一議得和尚先生也里可溫答失蠻人口多是夾帶俗人過番買賣影射避免抽分今後和尚先生也里可溫答失蠻人口等多過番興販如無執把聖旨許免抽分明文仰市舶司依例抽分如違以漏舶論罪斷沒爲此於至元三十年四月十三日奏過事內一件和尚先生也里可溫答失蠻每但做買賣去呵依著百姓每的體例裏與抽分者商量來奏

呵這的言語不曾了來那甚麼擬定那般者聖旨了也

一諸處市舶司舶商每遇冬訊北風發時從舶商經所在舶司陳告請領總司衙門元發下公據公憑並依在先舊行關防體例填付舶商大船請公驗柴水小船請公憑願往番邦明填所往是何國土經紀不許越過他國至次年夏訊南風回帆止赴原請驗憑發船舶司抽分不許越投他處舶司客舶司亦不許互指他處舶司舶商如本處舶司依見定例抽稅訖從舶商發賣與搬販客人亦依舊例就於所在舶司請給公遺從便於各處州縣依例投稅貨賣其原指所往番邦國土如有不能得到所指去處委因風水打往別國就博到別國物貨至回帆抽分時取問同伴在船人等相同別無虛誑依例抽分如中閒詐妄欺瞞官司

許諸人首告是實依例斷沒告人給賞

一舶商請給公驗依舊例召保舶牙人保明牙人招集到人伴幾名下船收買物貨往某處經紀公驗開具本船財主某人綱首某人直庫某人梢工某人雜事等某人部領等某人人伴某人船隻力勝若干檣高若干船面闊若干船身長若干每大船一隻止許帶小船一隻名曰柴水船合給公憑如大小船所給公驗公憑各仰在船隨行如有公驗或無公憑卽是私販許諸人告捕給賞斷罪所載柴水船於公憑內備細開寫亦於公驗內該寫力勝若干檣高若干船面闊若干船身長若干不到物力戶某人委保及與某人結爲一甲互相作保如將帶金銀違禁等物下海并將奸細歹人回舶并元委保人及同甲人一體坐罪公驗

後空紙八張泉州司用訖印信於上先行開寫販去物貨各各名件斤
重若干仰綱首某人親行填寫如到彼國博易物貨亦仰綱首於空紙
內就地頭即時日逐批寫所博到物貨名件色數斤重至舶司以憑照
數點秤抽分如曾停舶他處將販到物貨轉變滲泄作弊及鈔填不盡
或因事發露到官即從漏舶法斷沒保明人能自首告將犯人名下物
貨以三分之一給與充賞如舶司官吏容庇或覺察得知或因事發露
到官定將官吏斷罰不敍所給公驗行泉州司置半印勘合文簿立定
字號付綱主某人收執前去某處經紀須要遵依前項事理所有公憑
小船並照公驗一體施行

一番船南船請給公憑公驗回帆或有遭風被劫事故合經所在官司陳

告體間的實移文市舶司轉申總府衙門再行合屬體復如委是遭風被劫事故方與銷落元給憑驗字號若妄稱遭風等搬換船貨送所屬究問斷沒施行或有沿途山嶼灘嶼與海岸停泊汲水取柴恐有稍碇水手搭客等人乘時懷袖偷藏貴細貨物上岸博易物件或有舶商之家回帆將市舶司私用小船推送食米接應舶船卻行輒取貴細貨物不行抽解即是滲泄並許諸人告捕餘行斷沒犯人杖一百七下告捕人於沒官物內三分之一給賞仍行下沿海州縣出榜曉諭嶼嶼等處責在官吏巡檢人等常切巡捉催趕船隻隨卽起離彼處不許久停直至年例停泊如東門山等具呈各處市舶司廉能官封堵坐押赴元發船市舶司又行差官鑒搬上舶檢空船隻搜檢在船人等懷空方始放

令上岸如在番阻風經冬不還者次年回帆取問同船或同伴船隻人等是實依例抽分若使妄稱風水不便轉指買賣許諸人首告依例斷沒告人給賞

一海商不請驗憑擅自發舶船並許諸人告捕犯人斷罪船物沒官於沒官物內以三分之一充賞犯人杖一百七下如已離舶司卽於沿河所在官司告捕依上追斷給賞

一海商所用兵器并銅鑼作具隨住舶處具數申所屬依例寄庫起舶日給

一海商每船募綱首直庫雜事部領梢工碇手各從便具名呈市舶司申給文憑船請公印爲記人給五名爲保

一海商貿易物貨以舶司給籍用印關防具注名件斤數綱首雜事部領
梢工書押回日以物籍公驗納市舶司

一海商自番國及海南買販物貨到中國雖赴市舶司抽分而在船巧爲
藏匿者卽係漏舶正行沒官仍許諸人告首依例給賞犯人斷罪
一金銀銅錢鐵貨男子婦女人口並不許下海私販諸番物如到番國不
復前來亦於元齋去公驗空紙內明白開除附寫緣故若有一切違犯
止坐舶商船主

一市舶司招集舶商船隻行省行下衙門無得差占及有新造成舶船之
家本欲過番興販經紀亦是抽取課程並仰籍定數目今後並不得將
上項船隻差占有妨舶商興販經紀永爲定例以示招徠安集之意

一各處市舶司每年辦到舶貨除合起解貴細之物外據其餘物色必須
變賣者附近杭州各司舶貨每年不過當年十二月終起解赴杭州行
泉州司官庫交割舶司畫時開數具呈行省令有司隨卽估體時價比
至次年正月終須要估體完備行省預爲選收

一見今舶商去來不定多在海南州縣支泄細貨仰籍定姓名仍令海南
海北廣東道沿海州縣鎮市地面官司用心關防如遇回舶船隻到岸
常切催趕起離前赴市舶司抽分如官吏知情受賂容縱如或覺察得
知定是依條斷罪

一舶商梢水人等皆是辦課程之人落後家小合示優恤所在州縣並與
除免雜役

一夾帶南番人將帶舶貨者仰從本國地頭於公驗空紙內明白備細填附姓名物貨名件斤重至市舶司照數依例抽稅如番人回還本國亦於所坐番船公驗內附寫將去物貨不致將帶違禁之物仍差暗練錢穀廉幹正官發賣其應賣物貨將民間必用并不係急用物色驗分數互相配合須要一并通行發賣管限四月終了畢並不許見任官府權豪勢要人等詭名請買違者許令諸人首告得實將見獲物價盡數沒官斷罪於沒官價內一半付告人充賞仍令拘該肅政廉訪司體察外有泉州廣東兩處市舶司相離杭州地里駕遠依上差官就彼一體發賣

一行省行泉州司市舶司官每歲若至舶船回帆時月預期前去抽解處

所以待舶船到來依例封堵檢次先後隨時抽收不得因而走透作弊其監抽官員亦不得違期前去停滯舶商

一舶商下海開船之際合令市舶市輪差正官一員於舶商開岸之日親行檢視各各大小船內有無違禁之物如無夾帶卽時開洋仍取檢視官結罪文狀如將來有人告發或因事發露但有違禁之物及因而非理騷擾舶商取受作弊者檢視官並行斷罪肅政廉訪司臨時體察

一抽分市舶關防節目若有該載不盡合行事理行省行泉州司就便斟酌事宜從施行

一定到舶法抽分則例關防節目仰行省行泉州府司各處市舶司所在官員奉行謹守不得滅裂違犯行御史臺廉訪司常加體察毋致因循廢

弛元典

謹按元典章所載尙有泉州福物貨單抽分一條以非廣東市舶事例故不備錄

合刺普華改廣東都轉運鹽使兼領諸番市舶時惠州貿販之徒萬人爲亂討捕之本元史傳

卜天璋陞廣東廉訪使先是豪民瀕海築堰專商舶以射利累政以賂置不問天璋至發卒決去之本元史傳

明

明洪武初設市舶司於太倉黃渡三年二月罷之凡番舶至太倉者命軍衛有司封籍其數送赴京師尋復設市舶司於浙江福建廣東浙江通日

本福建通琉球廣東通占城暹羅西洋諸國

續文獻
通考

謹按其時置驛於浙江福建廣東三省以待市舶之至者在廣東者曰懷遠驛

洪武二年九月定朝貢附至番貨欲與中國貿易者官抽六分給價償之仍免其稅

明實錄

謹按邱濬大學衍義補言明雖沿前代市舶司之名而無抽分之法今考實錄則明初卽定抽分其後又有抽十分之五有抽十二者邱濬考之未審也

明除元亂定諸番例三年一貢世見來王許以互市立市舶提舉司以主諸番入貢舊制應入貢番先給以符簿凡貢至三司以合符視其表文方

物無僞乃送入京若國王王妃陪臣等附至貨物抽其十分之五其餘官給之直暹羅爪哇二國免抽其番商私齎貨物入爲易市者舟至水次悉封籍之抽其十二乃聽貿易然閩廣奸民往往有椎髻耳環效番衣服聲首入其舶中導之爲奸傍海甚苦之

都國利
病書

洪武二十七年以海外諸夷多詐絕其往來惟琉球真臘暹羅許入貢而緣海之人往往私下諸番貿易香貨因誘蠻夷爲盜命禮部嚴禁絕之

明實

錄

永樂元年八月帝以海外番國朝貢附帶貨物交易者須有官專主之遂

命吏部依洪武初制於浙江福建廣東設市舶提舉司隸布政司

明實
錄

謹按洪武時已設市舶司至是乃定爲提舉一員副提舉二員吏目一

員

永樂元年八月西洋瑣里國王遣使貢附載胡椒與民互市有司請征稅命勿征又刺泥國回回哈只馬哈沒奇刺泥等入貢因附載胡椒與民互市有司請征其稅亦不聽

續文獻
通考實

永樂四年六月廣東布政司奏每歲海外番夷入貢方物水路以舟楫運載惟南雄至南安限隔梅嶺舟楫不通請用民力接運上曰番貢無定期而農民少暇日自今番夷入貢如值農務之時其方物並於南雄收貯俟農隙運赴南安

明實錄

景泰三年五月爪哇國使臣乞以賜物貿易油麻之類於廣東許之

續文通獻

考

成化十七年暹羅貢使還至中途竊買子女及私鹽命遣官戒諭諸番

宗憲

紀本

宏治十年暹羅國入貢時四裔館無暹羅譯字官閣臣徐溥請移牒廣東訪取能通彼國言語文字者赴京備用從之

孝宗紀

先是暹羅占城爪哇琉球浡泥諸國互市俱在廣州設市舶司領之正德時移於高州之電白縣

明史外傳國

正德四年暹羅船有飄至廣東者市舶中官熊宣與守臣議稅其物詔斥宣妄攬事權撤還

明史外傳貨志食

正德十年暹羅國進金葉表朝貢館中無識其字者閣臣梁儲請選畱其使一二人入館肄習報可

明史外傳國

正德十二年西海夷人佛郎機亦稱朝貢突入東莞縣大統迅烈震駭遠邇殘掠甚至炙食小兒海道奉命誅逐乃出境自是海舶悉行禁止例應入貢諸番亦鮮有至者貢舶乃往漳泉廣城市貿蕭然非舊制矣於是兩廣巡撫都御史林富稽祖訓遵會典奏上得允於是番舶乃通焉灣泊有定所抽分有定例俸糧折色椒木兼支嘉靖中革去市舶內臣船至澳遣知縣有廉幹者往船抽盤提舉司官吏亦無所預

郡國利病書

嘉靖元年暹羅占城貨船至廣東市舶中官牛榮縱家人私市論死如律萬曆時紅毛番築土庫於大淵東佛郎機築於大淵西歲歲互市中國商旅亦往來不絕

明史食貨志

嘉靖元年給事中夏言上言倭禍起於市舶禮部遂請罷市舶而不知所

當罷者市舶太監非市舶也夷中百貨皆中國不可缺者夷必欲售中國必欲得之以故祖宗雖絕日本而三市舶司不廢蓋東夷有馬市西夷有茶市江南海夷有市舶所以通華夷之情遷有無之貨收征稅之利減戌守之費又以禁海賈抑奸商使利權在上罷市舶而利取在下奸豪外交

內訌海上無安日矣

明會典

嘉靖九年巡撫林富乞裁革珠池市舶內臣疏言廣東濱海與安南占城等番國相接先年設有內臣一員盤驗進貢方物臣以爲市舶太監不必專設以貽日腋月削之害市舶乞改巡視海道副使帶管待有番船至澳卽同提舉等官督率各該管官軍嚴加巡邏其有朝貢表文見奉欽依勗合許令停泊者照例盤驗若自來不曾通貢生番如佛郎機者則驅逐之

少有疎虞聽臣糾察庶幾事體歸一而外患不生若欲查照浙江福建事例歸併總鎮太監帶管似亦相應但兩廣事情與他省不同總鎮太監住劄梧州若番舶到時前詣廣東省城或致久妨機務所過地方且多煩擾引惹番商因而輒至軍門不無有失大體故臣愚以爲不如命海道副使帶管之便也

病郡國利
書

嘉靖十一年五月巡按林有孚疏言鎮守內臣之害兵部尙書李承勛覆議大學士張孚敬力持之遂革鎮守並市舶守珠池內臣皆革之一時稱

快

明史食貨志

嘉靖三十九年鳳陽巡撫唐順之議復三市舶司部議從之

明史食貨志

貨物許其交易在廣東者則西洋番舶之輶許其交易而抽分之若福建既不通貢又不通舶而國初設市舶之意浸不可考矣舶之爲利也辟之鑛然封閉則國收其利權而自操之是爲中策不閉不收利孔漏洩以資奸宄嘯聚其閒斯無策矣今海賊據浯嶼南嶼諸島公然通番舶之利而中土之民交通接濟殺之而不能止則利權之在下也宜講求國初設立市舶之意無洩利孔使奸人得乘其便其於海禁利害晰如也然市舶之與商舶其說稍異市舶者諸夷船舶無近地與內地民互爲市若廣之濠鏡澳然商舶者蓋土著民釀錢造舟裝土產徑望東西洋而去與海島諸夷相貿易其出有時其歸有候廣洋巨浸船一開帆四望惟天水相粘茫無畔岸而海人習知海道者用指南針即羅經也爲其導向相傳有航海針經

針或單用或指兩辰閒以前知某洋島所在約更時當行水路幾許打量水深淺幾托方言幾仍爲幾托海中島嶼作何狀某洋礁險宜慎或風雲氣候不

常以何法趨避之異時海販船十損二三及循習於常所來往舟無恙若

安瀾焉蓋海濱民射利精知如此東洋若呂宋蘇祿諸國西洋暹羅占城

諸國及安南交趾皆我羈縻屬國向無侵叛故商物不爲禁而特嚴禁販

日本者比於通番接濟之例於時凡販東西二洋雞籠淡水諸番及廣東

高雷州北港等處商漁船引俱海防官爲管給每引納稅銀多寡有差名

曰引稅後加增東西二洋每引納稅銀三兩雞籠淡水及廣東引納稅銀一兩其

漁文引歸沿海川縣

每請引百張爲率隨告隨給盡卽請繼原未定其地
給發惟番引仍舊

而亦未定其船萬曆十七年巡撫周宗議將東西二洋番船題定隻數歲

限船八十八隻給引如之後以引數有限而私販者多增至一百十引矣其征稅之規有水餉有陸餉有加增餉水餉者以船之廣狹爲準其餉出於船商陸餉者以貨之多寡計值其餉出於鋪商又慮有藏匿禁船商母輒起資以鋪商所接買貨物應稅之數給號票令就船完納而後許粥賣焉西洋船面闊一丈六尺以上者征餉銀五兩每多一尺加銀五錢東洋船頭小量減西洋十分之三陸餉胡椒蘇木等類計值銀一兩者征餉銀二分雞籠淡水名曰小番地近船小每船面闊一尺征水餉銀五錢陸餉亦如東洋二洋之例

加增餉者東洋中有呂宋其地無出產番人率用銀錢易貨錢用銀鑄造字用番文九六成色漳人今多用之

船多空回卽有貨亦無幾故商販回澳征抽水陸二餉外屬呂宋船者每船另追銀百五十兩謂之加增利病書郡國

彭韶遷廣東左布政使中官奉使雜遜鎮守顧恒市舶章眷珠池黃福皆

以進奉爲所名至需求民不勝擾詔先後諭奏

明史
本傳

謹按韋眷事又見陳選及高瑤傳

黃光昇遷廣東海北副使番舶稅重商人百計求免光昇爲奏減十之六

商乃樂輸

明史
本傳

沈思孝授番禺知縣殷正茂總制兩廣欲聽民與番人互市思孝持不可

明史
本傳

王希文授刑部給事中稅璫所至暴歛不法而粵珠池市舶尤甚疏奏罷之

香山
縣志

張大猷調香山令稅璫李鳳謀駐節縣內大猷言地近海瘴非稅使所宜居且番情叵測萬一犯及稅使如朝廷威德何璫沮而止

香山
縣志

萬曆末年李鳳增粵稅至二十萬粵商苦累百計求免不得四十一年十月給事中郭尙賓奏捧誦聖旨李鳳既已久病垂危著在任調理不准辭所收現在稅課并一應錢糧方物等項差內官阮昇前去暫管欽此伏查兩粵同一體先年粵西稅監病故皇上命四川稅監兼管今內臣何敢蒙蔽聖聰不循粵西事例而令阮昇得營接李鳳之差豈以廣東尙堪脅削乎夫粵東非有天雨之粟地出之金異於中州大藩也粵東商民非有計然之積蓄陶朱之多藏比於中州大賈也他藩錢糧惟供本藩粵東協濟粵西兵餉四五萬金他藩地方之患尙緩粵東盜賊之警無處無日不報歲征兵餉兵船銀四十萬兩支給不敷也以浙江福建湖廣大省監稅止各五六萬止因當時粵東撫按失計稅金遂三四倍於大藩至今尙十八

萬金加之商稅不足又派之糧差又派之稻穀又派之宰牛魚鯪菜果等項又派之濠鏡澳貨二萬兩榷解十餘年以來商民皮肉已盡脂髓并窮愁苦無聊之狀自撫按司道以至府縣之官無不人人目覩心悲望皇上撤回李鳳脫粵東商民於湯火者見於撫按之屢疏可徵也李鳳初至粵東縱棍徒以掠鄉民所在蠢蠢思亂賴巡按李時華縛其爪牙法繩之鳳始稍戢人心始稍安自後李鳳時復咆哮粵民屢欲撲殺之亦賴時華禁止李鳳乃得保其首領阮昇不知前車之當戒急作李鳳之後身營求內援立取中旨一時傳宣舉朝無不駭愕今粵東望照粵西事例帶管而不可得且旨內又無不許騷擾地方之語將聽阮昇爲所欲爲耶目前慮澳夷之叵測澳夷亦雄據以相持不過爲此二萬餉金耳榷此不能益內帑

之毫毛減此可以圖夷人之徙舍夷人已成尾大不掉之勢皇上乃惄二
萬餉金之蠲以忘國恤皇上之自爲謀與爲皇上謀者能恝然視爲無害
耶四十二年二月給事中郭尙賓奏舊年稅監李鳳物故蒙皇上察廷臣
言不委阮昇止命閩監高案兼管粵東聞命之日歡聲動地詎意奉旨兼
管曾幾何時高案輒聽棍徒唆撥而有移住粵東之望福建巡撫袁一驥
乃言近因廣東稅監李鳳病故已奉旨代爲督理該監方欲移住彼處或
姑聽其便夫粵東民非眾於他藩地非廣於他藩然粵東一年之稅他藩
三四年之稅也江西七萬而四萬取之贛關福建六萬而三萬取之東西
二洋乃粵東取二萬於澳夷猶不足額每年湊解十六萬無一非民膏民
脂也近蒙聖恩捐減二萬粵民嘉躍欲狂然二萬之減在他藩當爲曠蕩

之恩施在粵東僅爲太甚之稍去糧差之加減如故而杼軸日空一日牛
米雞豚菜果之苟斂如故而關市日擾一日盜賊日繁一日軍興之費日
增一日粵民困苦至此高案卽令營得入粵然已無可賅之民膏祇有不
可輕犯之民怒入粵何益於案也傳聞棍徒自粵走閩爲該監畫策該監
爲棍徒所用欲求一饕足於粵而忍心於此一驥復導之爲擇食之梟明
背兼管之新綸陰堅遺璫之弊政臣以爲高案在閩坐而虛糜在粵東飛
而肆虐坐而虛糜不可也飛而肆虐尤不可也惟并撤高案而付各稅於
有司則爲閩也實所以爲粵也乃臣更有請焉粵東尙征十六萬雖云勢
難驟減談者不謂粵民之易虐而謂粵力之能供榷之者不憂力之已殫
而憂數之少絀粵民之無告久矣有如大賜減免令粵民得比他藩稅額

則聖治民生兩大有裨璫輩亦當不萌覬覦又何營求移住鄰國哉

香山志

鄭和經事三朝先後七奉使所歷占城爪哇真蠻舊港暹羅古里滿刺加
浡泥蘇門答刺阿魯柯枝大葛蘭小葛蘭西洋鎖里加異勒阿撥把丹南
巫里甘把里錫蘭山喃渤利彭亨急蘭丹忽魯謨斯比刺潘山孫刺木骨
都束麻林刺撒祖法兒沙里灣泥竹步榜葛刺天方黎伐那孤兒凡三十
餘國所取無名寶物不可勝計

明史官傳

謹按費信作星槎勝覽所記蓋卽鄭和下西洋事而所載國名與鄭和
傳閒有異同

粵海關志卷四終

